

**CONFERENCE
DES EVEQUES CATHOLIQUES
DU BURUNDI**

Secrétariat Général

**ITANGAZO RY'INAMA Y'ABEPISKOPI GATOLIKA B' I BURUNDI
RYEREKEYE INYIGISHO *FIDUCIA SUPPLICANS* (UKWIZERA KWAMBAZA
IMANA) Y'IGISATA CA PAPA GISHINZWE UKWEMERA GATOLIKA**

Basaserdoti,
Bihebey'Imana,
Bakristu benewacu
Namwe mwese bantu b'umutima urondera ineza,

1. Tugiye guhimbaza uyu musu mukuru cane wa Noweli hagize imisi hari ivyandikwa vyinshi ku mbuga ngurukanabumenyi, bivuye ku kudategera neza inyigisho y'Igisata ca Papa gishinzwe Ukwemera gatolika, yo ku wa 18 Kigarama 2023, yerekeye insiguro y'imihezagiro mu butumwa bw'ukuragira ubusho bw'Imana. Muri ivyo vyinshi vyandikwa, hariho ivyemeza ko Umuvyeyi wacu Papa yoba yarekuye ukwubakana kw'abafise ibitsina bisa, ibindi bigaca bigirako bityoza umuryango wacu w'Ekleziya. Birumvikana ko mubisomye canke muvyumvise, bitoreka kubatera amadidane, kubahungabanya no kubababaza, mwibaza ko Ekleziya Gatolika yacu yoba yashingutse ku kwemera n'inyigisho yamye ihererekana kuva igitangura, ku vyerekeye isakramentu ry'ukwubaka rukristu.
2. Twebwe rero Abungere banyu, tuje kubahumuriza no kubaha umuco. Ni ko, inyigisho tuvuze y'Igisata ca Papa gishinzwe Ukwemera gatolika bise *Fiducia supplicans* (Ukwizera kwambaza Imana), itumbereye kwishura ikibazo c'uko, iyo babisavye, ababana nk'umugabo n'umugore kandi bompi ari abagabo canke abagore, be n'abubakanye badakurikije amategeko y'Ekleziya boshobora kuronswa umuhezagiro n'umusaserdoti nk'abubakanye. Mugabo, mu numero yayo igira kane, iyo nyigisho nyene iributsa inyishu Umuvyeyi wacu Papa yatanze itariki 4 Gitugutu 2023 yishura amakenga Abakardinali 5 bari bamutuye ku vyerekeye ibintu bimwe bimwe, birimwo n'ic'uko benabo bantu bohezagirwa. Yishuye agira ati : « Ekleziya isanzwe itegera mu buryo butomoye ico ari co urugo, ni ubumwe butabangikanya, burama kandi budatandukanywa bw'umugabo n'umugore, busanzwe bwugurukiye ukurondoka. Ni co gituma Ekleziya yirinda umugirwa uwo ari wo wose womera nk'uwuvuguruzwa ukwo kwemera, ugatuma abantu biyumvira ko ifashe nk'urugo ibitari rwo namba»¹.

¹ *Responsum ad dubium 2, a&c.*

3. Kubw'iyoy nyishu y'Umuvyeyi wacu Papa, isubiramwo inyigisho yamyey iherekanwa muri Ekleziya, ikaba ari na yo igaruka muri iyi nyigisho *Fiducia supplicans* (Ukwizera kwambaza Imana), murumva ko bitarekuwe kuronsa umuhezagiro ababana bafise ibitsina bisa, nk'uko boba bagize urugo. Ni nk'uko bitarekuwe guhezagira nk'abubakanye umugabo n'umugore babana batarekuriwe gusezerana rukristu. Noneho ukubana nk'umugabo n'umugore kw'abafise ibitsina bisa, si igicumuro gisanzwe, ni ivumwe², kandi biteye kubiri n'imico myiza yamyey iranga abarundi. Ni ko Imana yanka igicumuro ntiyanka umucumuzi ; mugabo impuhwe n'ikigongwe vyayo ntivyigera bija kubiri n'ukuri, vyama nyabuna birondera ukurokora umuntu, ngo ahinduke ave mu kabi³. Abantu bari mu gicumuro c'icese kandi baterekana namba ko boba bashaka kukivamwo, nta musaserdoti yobahezagira.
4. Nkako, umuhezagiro umusaserdoti atanga, naho hoba atari mu mugirwa wa Liturjiya, awutanga nk'uwatiwe, agaterwa iteka ryo gusangira na Yezu-Kristu ukuba Umutwe n'Umwungere w'Ekleziya. Awutanga rero atumbereye kurangura ico Ekleziya ibereyeho kw'isi : ukumenyeshya abantu Yezu-Kristu n'ukubanywanisha na We, ngo baronke ubuzima kandi ubuzima bwuzuye⁴.
5. Ariko mubitegere neza, ukudaha umuhezagiro benabo bantu, si ukubaca muri Ekleziya canke kubaheba, kuko baguma ari abana bayo. Turategerejwe kubandanya tubitwararika kugira ngo bagume biyumva mu muryango kandi bashobore no kwigarura.
6. None rero Bakristu, nimureme, Umuvyeyi wacu Papa ntiyahinduye inyigisho y'Ekleziya yerekeye ukwubaka rukristu. Ahubwo nimwirinde kujanwa n'ivyiyumviro vyiganje mw'isi ya none, bisuzugura Imana n'itegeko ryayo, bigafutanya umuntu yaremanwe agashusho kayo. Umukiza yatuvukiye hanyuma akitanga wese kubwacu, yaratsinze urupfu. Ari kumwe natwe gushika ku muhero w'isi nk'uko yabitwemereye⁵. Kubwa Mutima Mweranda, yaraduhaye ingabirano zidasa, adushinga n'ubutumwa butandukanye, kugira ngo dukoreranire, dufashanye kuba mu « bumwe bw'ukwemera n'ubwo kumenya Umwana w'Imana [...] Gurtyo ntituzobe tukiri abana bazungagizwa kandi bahitanwa n'igihuhusi cose c'inyigisho ihagaze ku bubeshi bw'abantu, ku buhinga bwabo bw'ugutwara abandi mu binyoma»⁶.
7. Turangije tubipfuriza Noheli nziza n'umwaka mushasha muhire w'2024.

Bigiriwe i Bujumbura, kw'igenekerezo rya 22 Kigarama 2023

Abungere banyu

² Raba *Bene Levi* 18, 22 ; *Abaroma* 1, 26-27.

³ Raba *Ezekiyeli* 18, 32 ; *Yohani* 8, 11.

⁴ Raba *Yohani* 10, 10.

⁵ Raba *Matayo* 28, 20.

⁶ *Abanyefezi* 4, 13-14.


✘ Bonaventura NAHIMANA

Umwungere Mukuru wa Diyosezi Nkuru ya Gitega,
ahagarariye Diyosezi ya Rutana,
akaba n'Umukuru w'Inama y'Abepiskopi Gatolika
b'i Burundi




✘ Salvatori NICITERETSE

Umwungere wa Diyosezi ya Bururi
akaba n'Icegera c'Umukuru w'Inama
y'Abepiskopi Gatolika b'i Burundi




✘ Gerevazi BANSHIMIYUBUSA

Umwungere Mukuru wa Diyosezi Nkuru ya Bujumbura



✘ Yohakimu NTAHONDEREYE

Umwungere wa Diyosezi ya Muyinga



✘ Buraziyo NZEYIMANA

Umwungere wa Diyosezi ya Ruyigi



✘ Joriji BIZIMANA

Umwungere wa Diyosezi ya Ngozi
ahagarariye Diyosezi ya Bubanza

